

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U TEŠNJU
Broj: 39 0 K 077172 25 K
Dana: 10.07.2026. godine

U IME FEDERACIJE BIH!

Općinski sud u Tešnju, po sudiji Besimi Ajanović, uz učešće zapisničara Mahmutović Ninele, u krivičnom predmetu protiv optužene B. ranije G. A., zbog počinjenog krivičnog djela „Neovlaštena proizvodnja i stavljanje u promet opojnih droga“ iz člana 238. stav 1. KZ F BiH, po optužnici Kantonalnog Tužilaštva Zenica broj: T04 0 KT 0057626 25 od 10.04.2025. godine, nakon održanog glavnog i javnog pretresa dana 08.07.2026.godine u prisutnosti Kantonalnog tužioca Husić Adis, optužene lično i njenog branioca Amir Krpić advokat iz Žepča, donio je i javno objavio u prisustvu KT Zenica, optužene i njenog branioca, dana 08.07.2026.godine, sljedeću:

P R E S U D U

OPTUŽENA: B. A. ranije G., kći A. i majke S. rođene B., rođena ... godine u Z., nastanjena na adresi G.K. bb Z., pismena, sa završenom srednjom školom, po zanimanju (završila gimnaziju), udata, majka jednog djeteta, lošeg imovnog stanja, nezaposlena, po nacionalnosti Bošnjakinja, državljanka BiH, JMB: ..., osuđivana presudom Općinskog suda u Zavidovićima broj: 42 0 K 032192 17 K od 09.07.2018. godine za krivično djelo iz člana 239. stav 3. KZ F BiH, na kaznu zatvora u trajanju od 5 (pet) mjeseci, uvjetno 2 (dvije) godine

KRIVA JE

što je,

dana 15.03.2024. godine, oko 19,45 sati, na području općine U., u mjestu U., dok se nalazila na zadnjem sjedištu putničkog motornog vozila marke „Peugeot“, reg. oznaka ..., kojim je do zaustavljanja upravljala R. F., suprotno odredbama člana 4. stav 1., 2, 3. i 5., a u vezi sa odredbom člana 19. i 20. Zakona o sprečavanju i suzbijanju zloupotrebe opojnih droga, kod sebe radi dalje prodaje neovlašteno posjedovala opojnu drogu „Cannabis“, tetrahidrokanabinol (THC) upakovanu u pet pvc paketića neto mase 2,789 grama, 3,026 grama, 0,970 grama, 0,993 grama i 0,940 grama, kao i dvije ručno pravljene cigarete, dužine cca 5 i 4,5 cm sa opojnom drogom „Cannabis“ neto mase 0,198 grama i 0,165 grama koja je pod rednim brojem 13 Liste opojnih droga i rednim brojem 26 Liste psihotropnih tvari iz tablice I „Zabranjene tvari i biljke“ proglašena kao takvom, zatim opojnu drogu „amfetamin“ upakovanu u dva paketića neto težina i to: 0,499 grama i 1,545 grama, a koja opojna droga je pod rednim brojem 1., Liste opojnih droga iz Tabele 2., Liste psihotropnih stvari proglašena takvom, kao i dvije tablete neto težine 0,438 grama i 0,392 grama sa sadržajem psihoaktivne komponente „metilendioksimetamfetamin“ (MDMA-Ecstasy), iako je bila svjesna da je

posjedovanje opojne droge radi dalje prodaje zakonom zabranjeno, što je i htjela, a koju opojnu drogu je dobrovoljno predala policijskim službenicima PS Usora,

čime je počinila krivično djelo "Neovlaštena proizvodnja i stavljanje u promet opojne droge" iz člana 238. stav 1. KZ F BiH, pa joj se na osnovu istih Zakonskih odredaba i uz primjenu od člana 49. i člana 62. KZ FBiH izriče

UVJETNA OSUDA

Kojom se optuženoj B. ranije G. A. kći A. iz M., za počinjeno krivično djelo, utvrđuje kazna zatvora u trajanju od 1 (jedne) godine i istovremeno određuje da se ista neće izvršiti ukoliko optužena u roku od 2 (dvije) godine i 6 (šest) mjeseci ne učini novo krivično djelo, a računajući od dana pravosnažnosti presude.

Na osnovu odredbe člana 78. stav 1. KZ F BiH i člana 238. stav 4. KZ F BiH od optužene oduzima se opojna droga „cannabis“, „amfetamin“ i „Ecstasy“ preostala nakon vještačenja, koja se nalazi deponovana u PS Usora i ista se ima uništiti.

Optužena se oslobađa plaćanja troškova krivičnog postupka i isti padaju na teret budžetskih sredstava.

Obrazloženje

Kantonalno tužilaštvo ZE-DO Kantona Zenica optužnicom broj: T04 0 KT 0057626 25 od 10.04.2025. godine, optužilo je B. ranije G. A. kći A., G. K. bb, Z., zbog počinjenog krivičnog djela „Neovlaštena proizvodnja i stavljanje u promet opojnih droga“ iz člana 238. stav 1. KZ F BiH, na način, vrijeme i mjesto kako je to opisano u dispozitivu navedene optužnice.

Sudija za prethodno saslušanje ovog suda je predmetnu optužnicu potvrdio dana 15.04.2025.godine i zakazao ročište radi izjašnjenja o krivnji.

Na ročištu koje je održano dana 08.05.2025. godine, optužena B. ranije G. A. je porekla krivnju po navedenoj optužnici, te je spis proslijeđen postupajućem sudiji radi zakazivanja glavnog pretresa.

Na glavnom pretresu održanom dana 08.07.2026.godine Kantonalni tužilac je pročitao optužnicu te izjavio da u cijelosti ostaje kod svih prijedloga dokaza kako subjektivnih tako i dokaza objektivne prirode koji su navedeni u optužnici.

Optužena je u uvodnom izlaganju u prisustvu svog branioca izjavila da je tačno da je počinila radnje opisane u optužnici, da priznaje krivnju i da je djelo počinjeno na način, mjesto i vrijeme kako je to opisano u činjeničnom opisu optužnice.

Priznanje optužene je potpuno i u skladu sa provedenim dokazima na glavnom pretresu odnosno dokazima koji su uloženi od strane Kantonalnog tužioca radi utvrđivanja da li postoji dovoljno dokaza o krivnji optuženog a to su: Zapisnik o uviđaju PS Usora broj: 08-02-11/3-03-11/24 od 15.03.2024. godine, Potvrdu o privremenom oduzimanju predmeta PS Usora broj: 08-02-11/3-06-05/24 od

15.03.2024. godine na ime G. A., zapisnik o izvršenoj radnji privremenog oduzimanja predmeta PS Usora broj: 08-02-11/3-05/24 od 15.03.2024. godine, Zapisnik o otvaranju i pregledu privremeno oduzetih predmeta i dokumentacije PS Usora broj: 08-02-11/3-03-11/24 od 04.04.2024. godine, Naredba za vještačenje KT ZDK broj T04 0 KTA 0057626 24 od 20.03.2024. godine, Fotodokumentaciju PS Usora broj: 11/24 od 15.03.2024. godine; Fotodokumentaciju PS Usora broj: 11/24-I od 04.04.2024. godine, Izvod iz kaznene evidencije za osumnjičenu G.A. PU I Zenica od 27.02.2025. godine, Zapisnik o ispitivanju osumnjičene G. A. PS Usora broj: 08-02-11/3-03-39/24 od 16.03.2024. godine, Zapisnik o saslušanju svjedoka R. F. PS Usora broj: 08-02-11/03-37/24 od 15.03.2024. godine, Zapisnik o saslušanju svjedoka M. M. PS Usora broj: 08-02-11/03-38/24 od 15.03.2024. godine, Nalaz i mišljenje hemijskog vještačenja, FUP Sarajevo, Centar za forenziku broj: 11-18/2-03-5-773 od 17.02.2025. godine.

Uvjerenje suda da je do priznanja krivnje došlo s razumijevanjem, te da je optuženi svjestan svih posljedica i obaveza koji proističu iz priznanja krivnje, te da postoji dovoljno dokaza o krivnji optuženog, pa je sud i prihvatio priznanje krivnje optuženog.

Iz Zapisnika o uviđaju PS Usora broj: 08-02-11/3-03-11/24 od 15.03.2024. godine, Potvrde o privremenom oduzimanju predmeta PS Usora broj: 08-02-11/3-06-05/24 od 15.03.2024. godine na ime G. A., Zapisnika o izvršenoj radnji privremenog oduzimanja predmeta PS Usora broj: 08-02-11/3-05/24 od 15.03.2024. godine, Zapisnika o otvaranju i pregledu privremeno oduzetih predmeta i dokumentacije PS Usora broj: 08-02-11/3-03-11/24 od 04.04.2024. godine, nesporno proizilazi da je kod optužene dana 15.03.2024.godine u vozilu kojim je upravljala R. F. pronađena jedna veća pvc prozirna vrećica, sa sadržajem više manjih pvc prozirnih vrećica u kojima su bile biljna materija, bijela praškasta materija i tablete, te dvije djelimično izgorjene motane cigarete, o čemu je sačinjena i Fotodokumentacija broj: 11/24 PS Usora sa datumom izrade 28.05.2024.godine.

Prema Nalazu i mišljenju Centra za forenzička ispitivanja, vještačenja i istraživanja Sarajevo broj: 11-18/2-03-5-773 od 17.02.2025. godine, koji nalaz predstavlja dokaz o prirodi supstanci koje su oduzete od optužene, bijela žuta praškasta materija iz dostavljene ambalaže sadrži psihotropnu komponentu „amfetamin“, zatim tragovi zeljaste materije i zeljasti materijal iz dostavljene ambalaže sadrži psihotropnu komponentu „Tetrahydrocannabinol (THC)“ u procentu veće od zakonom propisano, te predstavlja opojnu drogu „cannabis“, te dostavljene tablete sadrže psihotropnu komponentu 3,4 „metilendioksimetamfetamin“ (MDMA-Ecstasy) i nalaze se na Popisu opojnih droga psihotropnih materija, biljaka iz kojih se može dobiti opojna droga i prekusora Zakona o sprječavanju i suzbijanju zloupotrebe opojnih droga („Sl. glasnik BiH“ broj: 8/06, 103/08, 51/11), čiji promet je strogo zabranjen.

Iz naprijed navedenih dokaza a što je potvrđeno i priznanjem optuženog nesumnjivo proizilazi da je optužena dana 15.03.2024. godine, oko 19,45 sati, na području općine U., u mjestu U., dok se nalazila na zadnjem sjedištu putničkog motornog vozila marke „Peugeot“, reg. oznaka ..., kojim je do zaustavljanja upravljala R.F., suprotno odredbama člana 4. stav 1., 2, 3. i 5., a u vezi sa odredbom člana 19. i 20. Zakona o sprečavanju i suzbijanju zloupotrebe opojnih droga, kod sebe radi dalje prodaje neovlašteno posjedovala opojnu drogu „Cannabis“, tetrahydrocannabinol (THC) upakovanu u pet pvc paketića neto mase 2,789 grama, 3,026 grama, 0,970 grama, 0,993

grama i 0,940 grama, kao i dvije ručno pravljenе cigarete, dužine cca 5 i 4,5 cm sa opojnom drogom „Cannabis“ neto mase 0,198 grama i 0,165 grama koja je pod rednim brojem 13 Liste opojnih droga i rednim brojem 26 Liste psihotropnih tvari iz tablice I „Zabranjene tvari i biljke“ proglašena kao takvom, zatim opojnu drogu „amfetamin“ upakovanu u dva paketića neto težina i to: 0,499 grama i 1,545 grama, a koja opojna droga je pod rednim brojem 1., Liste opojnih droga iz Tabele 2., Liste psihotropnih stvari proglašena takvom, kao i dvije tablete neto težine 0,438 grama i 0,392 grama sa sadržajem psihoaktivne komponente „metilendioksimetamfetamin“ (MDMA-Ecstasy), iako je bila svjesna da je posjedovanje opojne droge radi dalje prodaje zakonom zabranjeno, što je i htjela, a koju opojnu drogu je dobrovoljno predala policijskim službenicima PS Usora, čime su se u ovakvim radnjama optužene stekla sva bitna obilježja krivičnog djela „Neovlaštena proizvodnja i stavljanje u promet opojnih droga“ iz člana 238. stav 1. KZ F BiH.

Da je optužena opojnu drogu neovlašteno posjedovala radi dalje prodaje proizilazi iz činjenice da je ista istovremeno posjedovala tri različite vrste opojne droge „Cannabis“, „Tetrahydrocannabinol (THC)“, „Amfetamin“ i „Metilendioksimetamfetamin“ (MDMA-Ecstasy), koje supstance su bile podijeljene u više pojedinačnih manjih paketića što je tipično za prodaju pripremljenu za krajnje konzumente, te se ista nalazila u vozilu koji je pogodan za brzu distribuciju na različitim lokacijama, pa kako je optužena bila svjesna svog djela i htjela njegovo izvršenje te kako ne postoje okolnosti koje isključuju krivičnu odgovornost optužene to je sud optuženu oglasio krivim i osudio kao u izreci ove presude.

Prilikom odlučivanja o vrsti i visini krivično pravne sankcije na strani optuženog sud je cijenio sve okolnosti koje su od uticaja za odmjeravanje kazne. Od olakšavajućih okolnosti sud je našao da je optužena priznaje izvršenje krivičnog djela i time doprinjela bržem okončanju krivičnog postupka, odnosno njegovoj ekonomičnosti i efikasnosti, da se kaje, njene lične i porodične prilike, da se u međuvremenu udala i ima jedno mlado dijete i da je nezaposlena, te da je neosuđivano lice (za osudu koja je izrečena presudom Općinskog suda u Zavidovićima od 09.07.2018.godine stekli su se uslovi za brisanje). Od otežavajućih okolnosti sud je cijenio društvenu opasnost ovog djela, pa cijeneći olakšavajuće i otežavajuće okolnosti sud je optuženoj izrekao uvjetnu osudu kojom je utvrdio kaznu zatvora u trajanju od 1 (jedne) godine i istovremeno odredio da se ona neće izvršiti ukoliko optužena u roku od 2 (dvije) godine dana i 6 (šest) mjeseci računajući od dana pravosnažnosti presude ne učini novo krivično djelo sa uvjerenjem da će se sa izrečenom kaznom zatvora u cijelosti postići svrha kažnjavanja, kako sa aspekta generalne, tako i sa aspekta specijalne prevencije.

Na osnovu odredbe člana 78. stav 1. KZ F BiH i člana 238. stav 4. KZ F BiH od optužene oduzima se opojna droga „cannabis“, „amfetamin“ i „Ecstasy“ preostala nakon vještačenja, koja se nalazi deponovana u PS Usora i ista se ima uništiti u skladu sa odredbama člana 194. stav 3. KZ FBiH.

U skladu sa odredbama člana 202. stav 4. ZKP FBiH optužena se oslobađa plaćanja troškova krivičnog postupka i isti padaju na teret budžetskih sredstava jer se radi o nezaposlenoj osobi slabog imovnog stanja i da ima tek rođeno malodobno dijete.

Na osnovu svega navedenog sud je odlučio kao u izreci ove presude.

PRAVNA POUKA:

Protiv ove presude dozvoljena je žalba
Kantonalnom sudu Zenica u roku od 15
dana od dana prijema presude.

Sudija

Ajanović Besima